

Mid dähm Lied hier, dun mir uns an eim Weddbewährb
bedeilischn: **"E Lied fiehr Gemnidz"**

GahEmmEssDeh

(KMSt. - Karl-Marx-Stadt)

Dexd: Eduard Sachsenmeyer

Musigg: Gertholm Mai

**Am Fuß des aldn scheenen Ährzgebirsches
in eener Mulde breid im Gemnidzdal,
da lieschd de graue Seele Sachsens,
de Indusdrie dähr Schdadt war gabbidahl!**

**Garl Morx dähr is im fernen Drier geboren,
in London dord befinded sisch sei Grab,
in Gemnidz is dähr nie gewähns,
weshalb dähr Schdadt man seinen Namen gab.**

**Gah Emm Ess Deh - Gah Emm Ess Deh -
hieß die Schdadt die uns so gud gefälld,
Gah Emm Ess Deh - Gah Emm Ess Deh -
war das eenzische Garl-Morx-Schdadt off dor Weld.**

**Dor Geisd von Morx, dähr is bei uns lähbendisch,
das kammor jedzd dachdäschlich sähn,
wenn Brolledarior eng voreinischd,
geballd im Arbeidsamd zusammenschdehn.**

**Dor Kobb von Morx in edles Ährz gegossn,
schdehd riesenhafd im Härzn unsror Schdadt,
de Arbeit fiehrendor Genossn,
die fand schdähds hindor seinem Riggm schdadd.**

**Dor Kobb von Morx in seine Dimensjohne
fälld ooch noch heide manschm sähr zur Lasd.
Die wolln ihn schderzn un enddhronen -
in kleene Kebbe haddor nie gebassd.**

**Gah Emm Ess Deh - Gah Emm Ess Deh -
hieß die Schdadt die uns so gud gefälld,
Gah Emm Ess Deh - Gah Emm Ess Deh -
war das eenzische Garl-Morx-Schdadt off dor Weld.**

**Gemnidz is in Jahrhundertn endschdandn,
es nidzd kee neies bundes Edigedd,
Schbard eisch de Neugeburd mid Wordn -
"Schdadt dor Moderne " is eenfach zu fedd!**

Gemnidz is so, wie viele annre Schdädte,

**so wie de meisdn Schädte in dor Weld,
nie iber aus beriehd gewähsn,
wemmor Baries un Rom dane hm hinschdelld.**

**Gah Emm Ess Deh - Gah Emm Ess Deh -
hieß die Schdadt die uns so gud gefälld,
Gah Emm Ess Deh - Gah Emm Ess Deh -
war das eenzische Garl-Morx-Schdadt off dor Weld.**

**Mor wird als Mänsch ganz ungefrachd geboren,
mor wird ganz eenfach in de Weld gesedzd.
Dähn Ord had mor sisch nisch ergohren,
mor liebd ihn doch, un meisdns bis zuledzd.**

**Gemnitz had ooch so mansche scheene Eggn,
de Landschafd rings hads manschm angedahn,
es gibd sähr Vieles zu enddeggn,
doch eene Ende wird niemals e Schwahn.**

**Gah Emm Ess Deh - Gah Emm Ess Deh -
hieß die Schdadt als mir noch Kinnor warn,
Gah Emm Ess Deh - Gah Emm Ess Deh -
Garl-Morx-Schdadt heeßd jedzd Gemnitz wie vor hunnord Jahr.**